



## PREGLED AKTIVNOSTI AMBASADORA U 2025. GODINI

Tokom 2025. godine ambasador Aleksandar Bogdanić je imao više od 60 sastanaka, prijema i posjeta, a održao je i više predavanja na univerzitetima. Ambasador se susretao sa predstavnicima zemlje domaćina i sa predstavnicima preko 30 drugih zemalja, s kojima je razgovarao o dosadašnjoj i budućoj saradnji, kao i drugim aspektima diplomatskih odnosa tih zemalja sa Bosnom i Hercegovinom.

Početakom 2025. godine ambasador Bogdanić je obavio sastanke sa predstavnicima kanadskog ministarstva inostranih poslova, u odjeljenju Global Affairs, 8. januara, kao i u odjeljenju za zapadni Balkan, 9. januara 2025. godine. Pored prijema povodom podizanja zastave Republike Kube i radnih sastanaka sa pojedinim diplomatama, na poziv glavnog sudije Vrhovnog suda Kanade Richarda Wagnera, ambasador Bogdanić je 27. januara posjetio i upoznao se sa radom Vrhovnog suda Kanade, sudijom Wagnerom i pojedinim drugim sudijama Vrhovnog suda.

Na poziv Ministarstva inostranih poslova Republike Kube, ambasador Bogdanić boravio je u prvoj službenoj posjeti ovoj zemlji u periodu od 22. februara do 1. marta 2025. godine povodom predaje akreditivnih pisama. Ambasador je 25. februara u Palati revolucije u Havani predao akreditivna pisma predsjedniku Republike Kube, Miguelu Díaz-Canel Bermúdezu, i time preuzeo i funkciju nerezidentnog izvanrednog i opunomoćenog ambasadora Bosne i Hercegovine u Republici Kubi. Nakon predaje akreditivnih pisama, ambasador Bogdanić je razgovarao sa Predsjednikom Kube o dosadašnjim bilateralnim odnosima između Bosne i Hercegovine i Republike Kube i oblastima razvoja buduće privredne i kulturne saradnje između dvije prijateljske zemlje. Bogdanić je tokom posjete održao i niz sastanaka sa predstavnicima kubanskih privrednih, kulturnih i obrazovnih organizacija, odnosno sa visokim funkcionerima u Ministarstvu inostranih poslova, Ministarstvu visokog obrazovanja i Ministarstvu spoljne trgovine i inostranih investicija, te predstavnicima kubanskog parlamenta, rektorom Univerziteta u Havani i direktoricom Kancelarije istoričara grada Havane.

Ambasador Bogdanić je tokom marta obavio nekoliko sastanaka u vezi s mogućim privrednim aktivnostima dva bosanskohercegovačka preduzeća u Kanadi, kao i u vezi sa izvozom proizvoda u Kanadu jedne veće bh. grupacije. Ove aktivnosti su se nastavile i kasnije tokom godine.

U okviru aktivnosti saradnje sa akademskom zajednicom, ambasador Aleksandar Bogdanić je 17. marta održao predavanje studentima postdiplomskog studija Univerziteta u Otavi o etičkim vrijednostima u javnom komuniciranju i novinarskom diskursu. Tokom marta i aprila ambasador Bogdanić je imao i nekoliko kurtoaznih posjeta i više radnih sastanaka sa članovima diplomatskog kora.

Ambasador Bogdanić je 8. maja učestvovao na komemoraciji Holokausta u organizaciji grčke ambasade u Otavi, a 9. maja bio je na prijemu povodom Dana Evrope u Nacionalnoj galeriji Kanade. Na poziv jermenske ambasadorice, ambasador je 16. maja prisustvovao obilježavanju 110. godišnjice jermenskog genocida u katoličkoj crkvi Notre Dame u Otavi. Na poziv finskog ambasadora, ambasador Bogdanić je 29. maja prisustvovao prijemu Odbrambenih snaga Finske. Ambasador Bogdanić se 30. maja sastao sa ambasadoricom i glavnom predstavnicom Generalne Palestinske Organizacije u Otavi i kasnije prisustvovao projekciji filma „Nulta tačka” (Ground Zero).



**AMBASADA/ VELEPOS LANSTVO BOSNE I HERCEGOVINE U OTAVI**  
**АМБАСАДА БОСНЕ И ХЕРЦЕГОВИНЕ У ОТАВИ**  
**EMBASSY OF BOSNIA AND HERZEGOVINA IN OTTAWA**  
**AMBASSADE DE BOSNIE ET HERZEGOVINE À OTTAWA**

Ambasador je 3. juna bio na prijemu za Dan državnosti Republike Italije u Nacionalnoj galeriji Kanade. Na sastanku „Prijatelji Ukrajine” u ambasadi Kraljevine Španije, ambasador je 5. juna učestvovao u diskusiji o postizanju mira u Ukrajini. Na poziv gradonačelnika Otave Marka Sutcliffa, ambasador Bogdanić se 5. juna sastao i sa gradonačelnikom i u srdačnoj atmosferi razgovarao o temama od zajedničkog interesa, poput saradnje Grada Otave sa diplomatskim korom i o drugim vidovima saradnje. Na poziv ambasadorice Saudijske Arabije ambasador Bogdanić je 6. juna bio na svečanoj večeri povodom Kurban-bajrama u rezidenciji ambasadorice. U srdačnom razgovoru posebno su naglašeni i prijateljski bilateralni odnosi dvije zemlje i ambasade i razmatrani su oblici dalje saradnje. Povodom Dana državnosti Republike Hrvatske, ambasador je 18. juna prisustvovao svečanom prijemu na poziv ambasadora Republike Hrvatske. Na poziv ambasadora Republike Turske, ambasador je 24. juna prisustvovao svečanoj večeri sa pojedinim članovima diplomatskog kora i kanadskih vlasti. Na ovoj večeri ambasadori su istakli istorijske veze, kulturološku povezanost i odlične bilateralne i prijateljske odnose i veze između Turske i Bosne i Hercegovine. Ambasador Bogdanić se 26. juna sastao i sa ambasadorom Pakistana, a 30. juna je u kurtoaznu posjetu ambasadi došao ambasador Urugvaja. Ambasador Urugvaja je istaknuo prijateljske bilateralne odnose dvije zemlje i obavijestio ambasadora Bogdanića o kandidaturi Urugvaja za članstvo u Savjetu ICAO.

Na poziv ministrice inostranih poslova Kanade Anite Anand, ambasador Bogdanić prisustvovao je svečanom prijemu Ministarstva povodom Dana Kanade 1. jula 2025. godine. Prijemu povodom Nacionalnog dana Egipta ambasador Bogdanić je prisustvovao 3. jula u rezidenciji ambasadora. Narednog dana, 4. jula, na poziv ambasadora SAD, ambasador Bogdanić je prisustvovao prijemu povodom Dana nezavisnosti, a 14. jula na prijemu povodom Nacionalnog dana Francuske, na poziv ambasadora Francuske.

Na poziv pomoćnice zamjenika ministra inostranih poslova Kanade, ambasador Bogdanić je 4. septembra prisustvovao svečanom ručku u Ministarstvu inostranih poslova Kanade povodom završetka mandata ambasadora Republike Srbije. Na prijemu ambasadora Švajcarske, ambasador Bogdanić je prisustvovao 10. septembra povodom Dana Švajcarske. U nedjelju, 14. septembra, ambasador Bogdanić je prisustvovao obilježavanju Dana veterana trgovačke mornarice Kanade ispred Nacionalnog ratnog spomenika Kanade.

U okviru aktivnosti iz javne diplomatije i saradnje sa akademskom zajednicom, ambasador Aleksandar Bogdanić je 15. septembra održao predavanje na Univerzitetu u Otavi o javnom komuniciranju i medijima u Bosni i Hercegovini. Sa predstavnicima singapurskog ministarstva saobraćaja, ambasador je održao sastanak povodom 42. zasjedanja skupštine Međunarodne organizacije za civilnu avijaciju u Montrealu. Na sastanku su, između ostalog, istaknuti prijateljski bilateralni odnosi, podrška Singapura BiH u projektima akademske razmjene sa BiH i izražen je interes za jačanje akademske i ekonomske saradnje dvije zemlje.

Na poziv Ambasade Republike Kube, ambasador Bogdanić posjetio je likovnu izložbu kubanskog umjetnika Michela Mirabala 18. septembra, a narednog dana, na poziv ambasadorice Slovačke, prisustvovao je prijemu povodom Nacionalnog dana Slovačke. Radni sastanak sa ambasadorom Švajcarske ambasador Bogdanić je održao 22. septembra. Na ovom sastanku istaknute su prijateljske veze i skladni bilateralni odnosi između dvije zemlje, kao i bliska saradnja dvije ambasade u Kanadi.

Ambasador je predvodio delegaciju Bosne i Hercegovine na 42. zasjedanju Skupštine Međunarodne organizacije civilnog vazduhoplovstva (ICAO) u Montrealu i učestvovao u radu plenarnog zasjedanja Skupštine, kao i glasanju za Savjet ICAO 28. i 30. septembra. Na



**AMBASADA/ VELEPOSŁANSTVO BOSNE I HERCEGOVINE U OTAVI**  
**АМБАСАДА БОСНЕ И ХЕРЦЕГОВИНЕ У ОТАВИ**  
**EMBASSY OF BOSNIA AND HERZEGOVINA IN OTTAWA**  
**AMBASSADE DE BOSNIE ET HERZEGOVINE À OTTAWA**

zasjedanju su učestvovala 192 delegacije, a 185 delegacija učestvovala su u glasanju, odnosno imale pravo glasa.

Na poziv Ministarstva međunarodne trgovine Kanade, ambasador Bogdanić je prisustvovao prijemu ministra međunarodne trgovine Manindera Sidhu. Sa ministrom je razgovarao o potencijalima i oblastima ekonomske saradnje između dvije zemlje. Ambasador Bogdanić je 6. oktobra prisustvovao ceremoniji podizanja zastave i prijemu povodom Dana nezavisnosti Republike Kipar. Na podizanju zastave Republike Mađarske povodom Dana revolucije ambasador je prisustvovao 23. oktobra. Otpравниk poslova Republike Azerbejdžan došao je u nastupnu posjetu ambasadoru Bogdaniću 29. oktobra. U srdačnoj atmosferi su potvrđeni tradicionalno prijateljski odnosi i razmatrane mogućnosti dalje ekonomske saradnje između dvije zemlje. Istog dana, 29. oktobra, ambasador je prisustvovao prijemu povodom Dana Republike Turske, na poziv ambasadora Republike Turske. Na poziv ambasadora Republike Rumunije, ambasador Bogdanić je 30. oktobra bio gost na prijemu povodom Dana oružanih snaga Republike Rumunije. Tokom mjeseca oktobra, ambasador je, između ostalog, održao i radne sastanke sa ambasadorima Bugarske, Hrvatske i Srbije.

Ambasador je 6. i 7. novembra posjetio Grand Valley State University u Grand Rapidsu u Mičigenu, na poziv univerziteta, i održao predavanja studentima, te prisustvovao svečanom prijemu povodom dodjele priznanja „istaknuti diplomat”. Na susretima i predavanjima istaknuta je obostrana želja za obnavljanjem i proširivanjem akademske saradnje između univerziteta u BiH i Grand Valley State Universityja i evocirana su iskustva nekadašnje saradnje između ovog univerziteta i Univerziteta u Sarajevu od prije gotovo četrdeset godina.

Dana 11. novembra ambasador je prisustvovao obilježavanju Dana sjećanja ispred Nacionalnog ratnog spomenika Kanade i položio vijenac u ime BiH. Na poziv ministrice inostranih poslova Kanade Anite Anand i Ambasade Kraljevine Švedske, ambasador Bogdanić je 18. novembra prisustvovao panel-diskusiji o strateškom partnerstvu Kanade i Švedske u podršci Ukrajini. Na ovom skupu prisustvovali su, između ostalih, i Nj. V. kralj Carl XVI Gustaf i kraljica Švedske Silvia, te pojedini parlamentarci, senatori i članovi diplomatskog kora. Ambasador Bogdanić je 20. novembra prisustvovao prijemu povodom Dana nezavisnosti Republike Poljske na poziv ambasadora Republike Poljske. Na poziv ambasadorke Republike Albanije, ambasador Bogdanić je 26. novembra prisustvovao prijemu povodom 113. godišnjice nezavisnosti Republike Albanije. Na poziv bosanskohercegovačkog amaterskog kulturno-umjetničkog društva „Sevdah” iz Otave, ambasador je 28. novembra prisustvovao premijernom izvođenju komedije „Kafana kod Bate” i prijemu nakon predstave. Ambasador se organizatorima i učesnicima zahvalio na pozivu, čestitao na upečatljivom prikazu bosanskohercegovačke svakodnevnice i pozvao ih na bližu saradnju.

Početak decembra ambasador je primio nerezidentnog ambasadora Republike Crne Gore u Kanadi u nastupnu posjetu. U toku sastanka ambasadori su potvrdili bliske i prijateljske odnose dvije zemlje i razgovarali o mogućnostima regionalnog nastupa u Kanadi u oblasti turizma i drugih privrednih grana. Tokom decembra ambasador je, između ostalog, na poziv rumunskog ambasadora, 8. decembra prisustvovao prijemu povodom Nacionalnog dana Republike Rumunije, a 9. decembra novogodišnjem prijemu za šefove diplomatskih misija na poziv ministrice inostranih poslova, uzvišene Anite Anand, u prisustvu premijera Kanade, preuzvišenog g. Marka Carneyja.

#### *Administrativna pitanja*

Organizacionim promjenama i poboljšanjima u radu konzularnog odjeljenja Ambasade tokom 2025. godine je omogućena bolja i efikasnija usluga za građane. Odjeljenje je pružilo više



**AMBASADA/ VELEPOSLANSTVO BOSNE I HERCEGOVINE U OTAVI**  
**АМБАСАДА БОСНЕ И ХЕРЦЕГОВИНЕ У ОТАВИ**  
**EMBASSY OF BOSNIA AND HERZEGOVINA IN OTTAWA**  
**AMBASSADE DE BOSNIE ET HERZEGOVINE À OTTAWA**

stotina usluga bh. državljanima, neposredno i putem pošte. Urađeni su i opsežni poslovi prikupljanja podataka iz konzularnog odjeljenja na zahtjev iz sjedišta. Ambasador se bavio i nabavkama, te pisanjem brojnih akata i dokumenata, poput dopisa, zahtjeva, diplomatskih nota, pisama, smjernica, odluka, ugovora, zapisnika, izvještaja, bilješki, naloga i evidencija. U zgradi Ambasade su izvršene i značajne popravke.

Iako su unapređeni uslovi rada osoblja, i pored svih pokrenutih aktivnosti ambasadora tokom godine na poboljšanju bezbjednosti, desili su se pojedini bezbjednosni izazovi. Pored sporadičnih demonstracija ispred Ambasade i dolaska nepoznatih lica u dvorište zgrade i pokušaja provala i krađa, ovdje se navode samo dva primjera ozbiljnijeg ugrožavanja bezbjednosti ambasadora.

U dvorištu zgrade Ambasade BiH u Otavi se 7. avgusta 2025. godine dogodio incident u periodu od 9 do 12 sati. Incident je počinio bh. državljanin sa stalnim boravkom u SAD. On je vlastitim automobilom blokirao ambasadorov prilaz u garažu, a potom se još dublje parkirao u dvorište iza zgrade Ambasade. Na zahtjev da se parkira ispred zgrade, prijetio je radniku Ambasade i remetio javni red i mir, galameći, puštajući glasnu muziku i odbijavši da ode, ne želeći pritom nikakvu konkretnu uslugu ili pomoć. Budući da pokušaji da se incident završi mirno nisu uspjeli, na poziv ambasadora došla je i policija. Pošto je nastavio da remeti javni red i mir, negdje oko 11.45 sati, policija ga je uz oružanu prijetnju uhapsila, odvela sa posjeda i predala graničnoj službi, jer je jednog od prethodnih dana, prema riječima policijskih službenika, ilegalno prešao američko-kanadsku granicu. Policijski službenici su saopštili ambasadoru da su ovu osobu uhapsili zbog ugrožavanja bezbjednosti ambasadora, narušavanja posjeda BiH i prijetnji osoblju. Prema informacijama službenika, budući da je osoba ilegalno prešla kanadsku granicu, deportovana je u BiH. Policijski službenici su takođe istakli i da bi Ambasada trebalo da unaprijedi zaštitu radi spriječavanja terorističkih prijetnji i opasnih incidenata poput ovog. Ambasador je ranije pisao Ministarstvu o potrebama unapređenja obezbjeđenja Ambasade, a i o ovom incidentu je odmah izvijestio Ministarstvo.

Drugi primjer su medijski napisi o ambasadoru jednog broja portala, uglavnom sa sjedištem u Federaciji BiH. Naime, počevši od 28. januara 2025. godine, pojedini portali su kontinuirano objavljivali članke o ambasadoru Bogdaniću na pristrasan i neutemeljen način. Iako su slični napisi pisani i o prethodnim ambasadorima, tirada članaka protiv ambasadora Bogdanića bila je posebno intenzivna. Objavljivanje članaka o ambasadoru započelo je još u martu 2024. godine, ali se intenziviralo od januara 2025. godine i nastavilo se sve do pisanja ovog pregleda.

U napisima su se iznosile uglavnom iste, neistine tvrdnje i optužbe i koristio se klevetnički jezik i omalovažavajući izrazi. Tvrdnje u člancima nisu imale osnova u materijalnim činjenicama niti u ponašanju i radu ambasadora. Ambasador poštuje ustav i zemlju u kojoj je rođen i iz koje dolazi i zakonito, dostojanstveno i savjesno je zastupa. Pored toga, uvažava različitosti i raznolikost našeg društva i spreman je da sasluša svako mišljenje o aktuelnim pitanjima i pojavama. Tokom svog dosadašnjeg mandata, ambasador je uvijek imao isti odnos prema svima u bh. dijaspori i uvijek je isticao ono što građane BiH povezuje i u svim ukazanim mu prilikama naglašavao važnost saradnje i razumijevanja unutar dijaspore.

Ambasador poštuje slobodu govora i pravo na drugačije mišljenje, kao i pravo građana i medija da kritikuju predstavnike vlasti i nije u javnosti reagovao na te članke. Jer, osim što su uvredljivi i neutemeljeni, pomenuti napisi nisu posebno zanimljivi ili korisni i u nekom drugom kontekstu na njih ne bi možda ni trebalo obraćati pažnju.

Međutim, u datom kontekstu, bezbjednosno gledano, kontinuirano objavljivanje ponovljenih kleveta, optužbi i prijetnji ambasadoru, kao i poziva dijaspori na „djelovanje”, uz



**AMBASADA/ VELEPOS LANSTVO BOSNE I HERCEGOVINE U OTAVI**  
**АМБАСАДА БОСНЕ И ХЕРЦЕГОВИНЕ У ОТАВИ**  
**EMBASSY OF BOSNIA AND HERZEGOVINA IN OTTAWA**  
**AMBASSADE DE BOSNIE ET HERZEGOVINE À OTTAWA**

neovlašteno korištenje slike ambasadora, počelo je da liči na nešto više od izražavanja mišljenja i ostvarivanja slobode govora. Moglo bi se reći da su – koristeći uvredljive i izraze koji su se nekad graničili s govorom mržnje – članci kumulativno komunicirali neprijateljski stav i netrpeljivost prema ambasadoru. Pored toga, samom količinom ponavljano, uglavnom klevetničkog sadržaja, objavljeni članci i fotografije počeli su sve više da liče i na vid uznemiravanja i medijskog progona.

Posljedično, gledano u cjelini, stalno objavljivanje članaka ovakvog sadržaja, uz korištenje slike ambasadora, počelo je da predstavlja i bezbjednosnu prijetnju po fizički integritet ambasadora i porodice, uglavnom zbog potencijalnog uticaja na ponašanje pojedinih čitalaca takvih napisa koji nisu upućeni u njihovu neistinitost, što je možda doprinijelo i incidentu od 7. avgusta 2025. godine.

Dodatno, ovakvi sadržaji potencijalno stvaraju i veći jaz i nerazumijevanje između pojedinih pripadnika različitih naroda, kako u zemlji tako i u bh. dijaspori.

Konačno, a možda i najvažnije, ovakvi napisi, budući da su, dobrim dijelom, implicirali ili podsticali sukob i neprijateljstvo, strateški gledano, djeluju i protiv interesa Bosne i Hercegovine jer, između ostalog, štete ugledu i ukupnoj percepciji Bosne i Hercegovine u Kanadi i svijetu. Naime, ambasadori ne predstavljaju i ne zastupaju sebe i svoje porodice nego svoju zemlju.

### *Zaključak*

Kroz aktivnosti u 2025. godini ambasador je, i pored administrativnih izazova i povremenih ometanja u radu i prijetnji ličnoj bezbjednosti, produbio i proširio diplomatski rad i saradnju Ambasade BiH sa svim značajnim akterima i stejkholderima u okruženju u kome djeluje. Kroz ove aktivnosti, ambasador je isticao osnovna načela bosanskohercegovačke spoljne politike i privrženost BiH putu članstva u Evropskoj uniji. U kontaktima s predstavnicima kanadskih vlasti, s kojima ambasador ima izuzetno dobre odnose, i dalje su, između ostalog, naglašavane mogućnosti veće privredne, akademske i kulturne saradnje, kao i potreba za olakšavanjem viznog režima za građane Bosne i Hercegovine, ponovno otvaranje Ambasade Kanade u Sarajevu, kao i potpisivanje pojedinih sporazuma, poput onog iz oblasti socijalnog osiguranja.

Kao i tokom 2024. godine, ambasador Bogdanić je i tokom 2025. godine bio pozivan i sastajao se sa zvaničnim predstavnicima brojnih zemalja iz cijelog svijeta, čime je nastavio i proširio održavanje skladnih diplomatskih odnosa i stvarao uslove za uspješnu saradnju na raznim poljima.

U susretima sa članovima i predstavnicima bosanskohercegovačke dijaspore, naglašavane su mogućnosti privredne i kulturne saradnje sa maticom, aktivnosti u predstavljanju različitih aspekata bh. kulture i privrede u Kanadi, usluge koje Ambasada nudi građanima i drugi vidovi moguće saradnje dijaspore i Ambasade. Ambasador je naglašavao i da će uvijek pozdraviti i podsticati one ideje i aktivnosti koje građane BiH u Kanadi spajaju, a ne one koje ih razdvajaju, kao i da „diaspore” mogu da imaju mnogo koristi od međusobne saradnje.

Pružanjem pomoći pojedinim bh. firmama za ulazak na kanadsko tržište, napravljeno je i nekoliko važnih koraka u cilju povećanja obima privredne razmjene između dvije zemlje.

Pored predstavljanja Bosne i Hercegovine na vlastitim predavanjima na kanadskim univerzitetima, ambasador je uspostavio kontakte sa lokalnom i sa regionalnom akademskom zajednicom i još uvijek se razmatraju različite mogućnosti akademske saradnje – bilo putem zajedničkog učešća u projektima EU ili bilateralnom saradnjom zainteresovanih institucija.

15. 12. 2025.